

**Malaysia-China Kukuh Kerjasama Banteras Jenayah Rentas Sempadan
Bernama
22 Oktober, 2012**

KUALA LUMPUR, 22 Okt (Bernama) -- Malaysia dan China mengukuhkan lagi kerjasama dalam membanteras jenayah merentas sempadan kerana dijangkakan kemasukan lima juta setahun rakyat republik itu ke negara ini, termasuk pelancong dan pelajar, dalam masa terdekat.

Menteri Dalam Negeri Datuk Seri Hishammuddin Tun Hussein berkata pada ketika ini seramai tiga juta warga republik itu berada di negara ini sama ada atas faktor belajar, melancong, bekerja dan tidak kurang juga kemasukan mereka secara tidak sah ke negara ini.

"Oleh itu satu mekanisme dan perbincangan secara terperinci mengenai sistem keluar masuk visa akan diberikan fokus mendalam oleh pihak imigresen kedua-dua buah negara," katanya kepada pemberita selepas mempengerusikan mesyuarat pertama kerjasama kumpulan kerja antara Malaysia dan China dalam membanteras jenayah rentas sempadan di sini Isnin.

Turut hadir pada mesyuarat itu ialah rakan sejawatnya Meng Jianzu, Menteri Keselamatan Awam China, yang tiba di negara ini semalam untuk lawatan kerja tiga hari ke Malaysia, termasuk menghadiri mesyuarat tersebut.

Penubuhan Kumpulan Kerja ini telah dipersetujui melalui perjanjian kerjasama dalam memerangi jenayah rentas sempadan yang ditandatangani bersama Meng pada 2 Ogos lepas di Beijing, China.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=704015>